

55  
F A C T V M,

Pour les Conseillers, Notaires, & Secretaires du Roy Audianciers  
& Controolleurs des Chancelleries des Parlemens de France.

*Contre les Clercs Notaires, & Secretaires de sa Maieité.*



Nciennement il n'y auoit qu'un grand audiancier, & vn Contrerooleur general en la Chancellerie de France. Lesquels commettoient es Chancelleries des Parlemens des Clercs, Notaires, & Secretaires du Roy pour faire les charges de l'audience, & controolle.

Le Roy Henry deuxiesme par son edit du mois de Ianuier 1551. erigea en tiltre d'office formé, & crea en chacune Chancellerie desdits Parlemens, vn audiancier, & vn Contreroolleur, ausquels il donna la qualite de Conseillers audianciers, & Contreroolleurs, & outre les crea ses Clercs, Notaires, & Secretaires avec pouuoir & puissance de signer toutes expeditons & actes de iustice. De telle maniere qu'il ne leur seroit necessaire, d'auoir n'y tenir autre office du nombre ancien des Clercs, Notaires, & Secretaires de sadite Maieité, maison, & Couronne de France.

Ce mesme edit donne ausdits audianciers, & Contreroolleurs, tous pareils, & semblables priuileges dõt iouissent lesdits Clercs, Notaires, & Secretaires de la maison, & Courone de France, sans en excepter vn seul.

Et les fait grands boursiers des le iour qu'ils sont pourueuz de leurs offices, outre leurs gaiges ordinaires, & le droit de registre dont iouissent lesdits audianciers.

En l'an 1570. sadite Maieité crea en tiltre d'office vn autre Contreroolleur en la Chancellerie de Paris, qui fut alternatif, & dõt fut pourueu, maistre Thomas de Pilleur qui quitta l'estat de Secretaire du Roy, duquel il iouissoit long temps auparauant, pour se faire pouruoir dudit office de Controolleur alternatif, à la poursuite priere & requeste que lesdits Secretaires en firent au Roy, comme appert par leur requeste produitte au procez. Et porte ledit edit ceste qualite de Conseiller, Notaire, & Secretaire du Roy, & Controolleur de la Chancellerie de Paris, avec clause expresse de pouuoir signer, & expedier toutes lettres & actes hors de semestre comme pendant iceluy, & d'exercer en l'absence, maladie ou empeschement l'un de l'autre.

Depuis ce temps, c'est assauoir en 71. & 76. le nombre desdits Conseillers, Notaires, Secretaires du Roy, audianciers & Controolleurs esdites Chancelleries des Parlemens de France, est augmenté, tellement qu'ils sont pour le present quatre audianciers, & quatre Controolleurs en chacune Chancellerie, seruans par quartier, & ayans tous hors de





leur quartier pouuoir de signer & expedier lettres, & tous actes esdites Chancelleries & estendue des Parlemens où ils sont establis.

Voila leur qualité, en vertu de laquelle ils ont tousiours precedé, tous les Secretaires, & en leurs fonctions au Seau, & controole, & en toutes assemblees publiques & particulieres, comme ayans plus de dignité, & de qualité. Et ne s'est trouué iusques à present aucun desdits Secretaires qui ait entrepris de preceder aucun desdits audianciers & Controolleurs, sinon maistre Noel Guerout Secretaire du nombre des six vingts, qui s'est essayé de rompre cest ordre ancien, & voulu passer deuant maistre Nabert Hurtault, Conseiller, Notaire, & Secretaire de sa Maiesté, & Controolleur en la Chancellerie de Rouen.

Pour faire iuger ceste preéminance il s'est adressé à messieurs du grand Conseil, & y a fait assigner ledit Hurtault pour voir dire qu'il le precedera, & aussi tous les autres Conseillers, Notaires, & Secretaires du Roy audianciers & Controolleurs des Chancelleries de ce Royaume, en toutes assemblees publiques & particulieres.

Au bruit de ceste instance se sont ioints tous lesdits Secretaires, comme aussi tous les audianciers, & Controolleurs des Chancelleries des Parlemens de ce Royaume, se sont ioints audit Hurtault, ont esté ouys en l'audience, & appointez à escrire.

Guerout Secretaire pour son particulier dit qu'il est plus ancien receu, & pour le iustifier, montre qu'en 92. pendant les troubles il fut pourueu par le Duc de Mayenne, d'un estat de Secretaire.

Tous les Secretaires en general dient qu'ils sont plus anciens de creation, & partant qu'ils doiuent auoir plus de grade, qu'ils signent par toutes les Chancelleries, & les defendeurs seulement dans l'estendue de leurs Parlemens.

Que lesdits audianciers, & Controolleurs n'ont fonction que trois mois, que la leur est perpetuelle.

Que lesdits audianciers sont comptables, & partant qu'ils les doiuent preceder.

Quand au particulier bien qu'il ne se doine disputer, ledit Hurtault ~~pour~~ dit, qu'il est plus ancien <sup>receu</sup> que Guerout, d'autant que ses lettres de prouision, & reception sont precedées en date celles dudit Guerout, qui eust nouvelles prouision du Roy, lors que la ville de Rouen fut reduicte en l'obeissance de sa Maiesté, & les prouisions dudit Duc de Mayenne cassez. Et que les pourueuz par resignation audit party du Duc de Mayenne, prindrent nouvelles lettres de sa Maiesté: comme Guerout fist plus d'un an apres que ledit Hurtault estoit pourueu de son Estat.

De sorte que Guerout fut nouvellement pourueu par le Roy, fit nouveau serment, fut de nouuel immatriculé au rang desdits Secretaires, & n'a eu aucun rang avec eux sinon du iour de sadite reception fai-



Et en vertu des lettres de sadite Maieité, & lesquelles sont comme dit est, posterieures celles dudit Hurtault auquel appartiendroit, quand ledit Hurtault ne seroit que Secretaire, par ce seul moyen la preséance.

Pource qui concerne le general, & que les Secretaires se dient plus anciens officiers, lesdits audianciers, & Controolleurs soustiennent qu'ils sont aussi anciens que lesdits Secretaires, & que les vns n'ont point esté creéz sans les autres, l'ordre requerant qu'il y eust vn audiancier, auquel les Secretaires presentassent les lettres pour les faire sceller: comme il appert de ce fort amplement par le *sciendum* des Secretaires, produit au procez, lequel monstre ~~amplement~~ avec quel honneur & respect, lesdits secretaires doiuent parler ausdits audianciers, & Controoleurs leur presentant leur Seruiui.

Qu'au reste, l'antiquité ne sert aucunement en ceste cause. D'autant que les dignitez & preéminences, dependent seulement de la volonté du Roy, non de l'antiquité, estant chose trop commune que les derniers creéz, s'ils ont plus d'autorité, & de qualité, precedent les anciens creéz, qui l'ont moindre.

Que si entre ceux qui n'ont point plus de fonction les vns que les autres, & qui sont d'un mesme corps, mais de diuerse creation, l'antiquité ne donne point de prerogatiue, il faut dire doncques que les prerogatiues appartiennent seulement à ceux qui ont plus digne qualité & fonction: comme est celle desdits audianciers, & Controolleurs à l'esgard desdits Secretaires.

Car lesdits audianciers, & Controolleurs, ont la qualité de Conseillers du Roy, que les Secretaires n'ont pas, ains seulement celle de Clercs, Notaires, & Secretaires, & s'ils disent qu'ils ont pris ladite qualité de Conseiller c'est vne vsurpation sans iuste tiltre, qui leur doit tourner à blasme.

Au contraire lesdits Conseillers, Notaires, Secretaires du Roy, audianciers & Controolleurs, ont ceste qualité de Conseillers par leurs edits de creation, pour ce qu'ils en font la fonction, en ce qu'ils ont l'auctorité de iuger si les lettres que les Secretaires leur presentent pour faire sceller sont de iustice, si elles sont bien escrites, & octograhées, & si elle ne sont telles, il les refusent ou font reformer, & en cela apportent leur iugement qui est vne superiorité sur lesdits Secretaires.

Et ceste qualité de Conseillers du Roy, leur donne l'auctorité de faire entretenir les reiglemens de la Chancellerie, & les fait nommez premier que lesdits Secretaires, en tous edits reiglemens, & autres lettres patentes, ou les vns & les autres sont nommez, & dont sont produits infinis articles au procez, collationnez tant sur les grandes ordonnances que Code Henry. Dans lequel Code Henry, en l'article troisieme des priuileges desdits Secretaires, il est dit que lesdits Se-



eretaires porteront leurs lettres ausdits audianciers & Controolleurs, entre les mains desquels, & en presence de trois ou quatre de leurs confreres, ils presteront serment d'entretenir les ordonnances Royaux, & autres concernans leur compaignie.

Leur auctorité se cognoist encor, lors qu'il faut porter quelques parolles, ou à monseigneur le Chancelier, ou à messieurs les maistres des Requestes, pour choses concernans les affaires, ou deuoir des officiers, de la Chancellerie: car elle se porte tousiours, par l'audiancier ou Controolleur, bien qu'ils soient assiste de plusieurs Secretaires du Roy, mesme des plus anciens.

Aussi en ce que les seuls audianciers, & Controolleurs peuent taxer la valeur des lettres, & mettre le contêtor sur les Chartres, & quand il arriue difficulté pour la taxe des lettres, ils prennent les voix de la compaignie, puis prononcent & taxent, comme personnes qui president en la troupe desdits Secretaires: lesquels Secretaires ne peuent faire ladite taxe ne mettre ledit contentor à peine de faux.

Aussi que les seuls audianciers, & Controolleurs peuent mettre les gratifications sur les lettres iustement gratifiables pour les qualitez, & merites des parties, mesmes sur les autres que le Roy entend estre liberalement gratifiees pour la pauureté, ou necessité des poursuuans.

C'est vne autre grande auctorité sur lesdits Secretaires que d'estre Iuges du Seruiuy, qu'ils presentent chacun mois, afin d'auoir leurs bourses prouenant du droit qu'ils ont sur le seau, ce que les seuls audianciers & Controolleurs peuent faire, car si le Seruiui n'est iugé par eux veritable, il ne leur est point fait de bourse.

Et au roolle qui est fait à la fin de chacun mois des lettres dont sont composees lesdites bourses, lesdits audianciers, & Controolleurs signent les premiers, puis les Secretaires qui y assistent.

En la grande Châcellerie ou il n'y à lieu certain pour faire lesdits contrôlle & bourses, il est fait au logis de l'audiancier ou du Controolleur, & non chez vn Secretaire, quelque ancien qu'il soit, s'il n'estoit commis de l'audiancier ou Controolleur, en ce cas sa commission qui seroit plus honorable que son office feroit aller lesdits Secretaires ses confreres chez luy, pour y faire lesdits contrôlles chacun iour de seau & bourses à la fin du mois. Le contenu de cest article s'effectue tous les iours, & se feroit de mesme au Chancelleries des Parlemens, s'il ny auoit lieu destiné expres appellé l'audience, à cause desdits audianciers & Controolleurs qui president.

Ils marchent aux entrees des Roys & Roines de France, premiers apres messieurs les maistres des Requestes, avec le manteau ~~rouge~~ de velours, & deuant le seau, & si lesdits audianciers, & Controolleurs sont absens, des plus anciens Secretaires tiennent leur places, comme plus honorables que les leur de Secretaires, cela se voit dans le liure



produit des entrees du feu Roy Charles neuuiesme, & de la Reine Isabel son espouse faictes à Paris, ou maistre Hierosme le Roy Secretaire du Roy fort ancien, teint la place du Controolleur qui l'y commist pour son indisposition.

Aussi tiennent ils si honorables les commissions desdits audianciers, & Controolleurs qu'ils leur ont fait vne instance au Conseil d'Estat, de laquelle monsieur le President Iaannin est Raporteur, afin d'estre leurs commis, & veulent empescher s'ils pouuoient que lesdits audianciers, & Controolleurs, puissent commettre de leurs confreres en leur absence, qui est vne chose inaudite qu'un officier de pareille qualité ne puisse exercer pour son confrere, cela fait cognoistre leur peu de raison, & les mauuais fondemens qu'ils prennent à faire des procez, n'estant pas mesmes credible, qu'ils plaissent pour raualler leur qualité faisant la commission d'officiers qu'ils veulent preceder.

Toutes ces prerogatiues leur donnent aussi en la Chancellerie, autre place qu'à eux: Car les audianciers & Controolleurs sont assis sur chaises couuertes de fleur de lis, & proche de messieurs les maistres des Requestes, & au controle & confession des bourses, ils tiennent les premieres places.

Leur dignité se cognoist encor lors qu'il se tient des grands iours, où le Roy porte les fraiz des officiers de la chancellerie, que sa Maieité y commect par ses lettres patentes, où lesdits Audianciers & Controolleurs sont nommez premiers que lesdits Secretaires: mesmes ont vne plus grande taxe: car si lesdits Audianciers & Controolleurs ont douze liures par iour, lesdits Secretaires n'en ont que neuf, ou autre moindre que lesdits Audianciers & Controolleurs.

Il ne faut donc pas qu'ils croyent que leur antiquité leur donne prerogative, ayant esté creéz avec eux, comme il a esté dict, un Audiancier & Controleur. Et quand leurs offices n'auroient esté creéz que depuis peu de iours (que non) ils les precederoient avec les fonctions & les rangs qu'ils tiennent au dessus d'eux, dont mention est cy deuant faicte.

Pour le second qu'ils signent par toutes les chancelleries, cela ne donne prerogative: car leur signature n'a auctorité sans le sceau, qui est le caractere qui parfaict la lettre, & qui est apposee par le ministere & rapport de l'Audiancier.

Il y a plus, que lesdits Secretaires ne vont en aucune chancellerie où il n'y ait des Audianciers & Controolleurs qui y ont plus d'auctorité que lesdits Secretaires qui peuuent seulement faire vne lettre & la signer, apres ils l'apportent à l'Audiancier & Controleur pour la faire sceller, si elle est en forme deuë, & pour la taxer de sa valeur: lesdits Audianciers & Controolleurs la peuuent faire & signer comme eux, y met-



tre la taxe & faire apposer le sceau. c'est rendre eux seuls l'expedition parfaite.

Pour le troisieme, ils dient qu'ils ont fonction perpetuelle : la mesme chose ont les Audianciers & Controlleurs : car tous les Edicts de leurs creations produicts au proces, portēt le pouuoir que le Roy leur donne de signer & expedier lettres & tous actes, tant en exercice que hors d'exercice de leurs offices : la lecture desdits Edicts fera cognoistre leurs escritures aussi mal fondees que leur proces, & qu'ils disputent le texte d'Edicts bien & deuement verifiez, mesmes lesdits Audianciers & Controlleurs ont grande bourse chacun mois de l'annee, & la grande bourse du Roy appartient au Controlleur, qui signe au lieu de sa Maiesté sur le rolle desdites bourses, & en lieu plus eminent que tous les Secretaires.

Ce n'est pas petit rang d'estre grands boursiers le jour mesme qu'on est receu en vn office, puis qu'il faut qu'un Secretaire boursier soit vingt cinq ou trente ans, auparauant que d'auoir ceste grand bourse.

Pour le quatriesme que les Audianciers & Controlleurs sont comptables, ce moyen sera ingé ridicule par ceux qui scauent que lesdits Audianciers & Controlleurs prestent sermēt seulement deuāt monseigneur le Chancelier, comme Conseillers du Roy, Audianciers & Secretaires de sa Maiesté, qu'ils ne donnent cautions pour leur manimēt, ne font aucun serment à la Chambre des Comptes, que leurs fonctions sont autres que de comptables, & que monseigneur le Chancelier rend en son nom pour le grand sceau, vn pareil compte que font lesdits Audianciers pour le droit du Roy, des chanceleries de ses Parlemens, mais que desdits Secretaires, plusieurs sont comptables, & fermiers & commis de comptables, comme chacun scait.

Lesdits Secretaires ont voulu auancer par leurs escritures que les Audianciers prenoient estat d'eux, pour estre rapporté en leur compte, mais cela est tant esloigné de la verité, que le contraire se verra entierement au proces, car il n'est parlé aucunement par le compte desdits Audianciers, des Secretaires, & n'est rapporté sinon le contrerolle signé du seul Controlleur de l'audience.

Il suffit aux Audianciers & Controlleurs d'auoir monstré que en tout ils ont plus de dignité, de qualité & de prerogatiue que lesdits Secretaires, le Roy n'ayant donné vn seul priuilege ausdits Secretaires, qu'il n'ait rendu commun ausdits Audianciers & Controlleurs, qu'il a fauorisez du tiltre de Conseillers de sa Maiesté, & lesdits Secretaires de Clercs & Notaires seulement.

Et pour preuue, l'Edict du Roy Henry II. fait en Ianuier 1551. dont le texte est imprimé dans tous les tomes des grandes ordonnances en fait foy, & l'original extraict de la Chambre des Comptes, ne reçoit point de difficulté.



Tous les autres Edicts seruans de preuue aux articles de ce discours sont aussi produicts audit proces, & la plus grande partie comme le precedent, extraicts de ladite Chambre des Comptes.

La declaration du Roy faite en 83. lors que M. Iean Baptiste Châpin cōtracta pour le party du sel, afin que lesdits Audianciers & Controlleurs iouïssent de leurs priuileges ordinaires d'auoir du sel, en payant seulement le droict du marchand, est produicte & extraicte de ladicte Chambre des Comptes, & signée, La Fontaine il s'y voit fort claiement que sa Maieité tient lesdits Audianciers & Controlleurs, les Clercs, Notaires & Secretaires, & ledit estat de Secretaire ioinct inseparablement avec leursdits offices d'Audianciers & Cōtrollours, & que sous ce mot general de Secretaire de sa maieité, il entend comprendre tant lesdits Audianciers & Contrerolleurs, que lesdits Secretaires les tenans, & reputant tous indifferemment ses Notaires & Secretaires, lesquels il entend qu'ils iouïssent de tous & pareils priuileges que lesdits Notaires & Secretaires, de la maison & couronne de France.

Les susdits Edicts, declarations & arrests produicts au proces, monstrent euidentement l'imposture desdits Secretaires, qui vouloient faire croire que lesdits Conseillers, Notaires & Secretaires du Roy, Audianciers & Controlleurs des Chanceleries de France, n'estoient Secretaires que *ad effectum*, le texte desdits Edicts fera cognoistre tout le contraire, & que l'inuention est mal à propos, estant deduicte par de si bons tiltres, l'un desquels, qui est l'Edict de 51. porte qu'ils sont si bien creez Clercs, Notaires & Secretaires du Roy, qu'il ne leur sera besoin de prendre autre office, du nombre antien de Clercs, Notaires & Secretaires de la maison & couronne de France.

En general, lesdits Audianciers & Controlleurs, iouïssent, comme il a esté dit, de tous & pareils priuileges que lesdits Secretaires, sans en excepter vn seul, & de ce sont plusieurs arrests produicts au proces, mais lesdits Audianciers & Controlleurs ont au dessus d'eux les preeminences deduictes cy deuant, avec la possession de lesauoir tousiours precedez, tant en public qu'en particulier.

A quoy ils concluent, à ce qu'il plaise au Conseil les y maintenir.





